

von Wulf Wager

B'sondre Veegl



"Ondr älle isch Betrug, bloß ondr dr Milch ischt Wasser", so hoißt a alde schwäbische Weisheit.

Jetzt send jo net bloß Inveschtmentbanker ond Politiker als Betrüger entlarvt worde, noi, die Traumänner deutscher Schwieger- ond Großmütter, die Götter der Volksmusik, hend au bschissa ond send jetzt aus dem Olymp der volkstümlichen Musik vrstoßa worda.

Die Südtiroler Vögel send übrigens die oinzige Vögel, wo's Schwänzle vorna hend: die Kastelruther Spatzen. Ihr ehemaliger Mänätscher hot ausplaudert, dass die Musikanta koin goziga Ton uf ihre CDs selber gespielt hend. Des send dia Mili Vanili der Volksmusik. Sie sheat en ihre Tiroler Trachta oifach bloß schee aus, kennat aber net wirklich gut gnuag spiela, dass es fir a CD langa dät. Dia Südtiroler Singvögel hend Milliona von übergewichtige, vollbusige Fraua jenseits der Fuffzig aus ihre scheenste Heile-Welt-Träum gweckt. Wen sollat dia denn jetzt no a'himmla? Wenn scho ihre volksmusikalische Traumänner ganz oifache Betrüger sind?

Mein Gott, isch des peinlich. Aber do sieht mr mol wieder, was der ganze Misch auf 457 deutsche Fernsehkanäl fir a Blaschttiggwelt vorgaukelt. Do isch der volksmusikalische Spatzaskandal bloß die Spitze voma Eisberg.

Die Spatza send jo eigentlich koine Zugvögel. Aber dia werdat sich jetzt sicher amol a Weile zurückzieha. Aber koi Angscht, liebe Freunde der volkstümlichen Musik. Im näggschda Frühjor fliaht wieder a neue Generatio von Singvögel om's blonde Lockahoor vom Hansi Hinterseer ...

Bis näggschd Woch

Ihr

A handwritten signature in black ink, appearing to read 'Wulf Wager'. The signature is stylized and fluid, with a long horizontal stroke extending to the right.

Wulf Wager

Alle Kolumna zom Nochlesa onder: www.woascht.de oder em facebook em Wulf Wager Fanclub